

Despues di Clean-up, ata den week-end

ATROBE A HAYA DROGA DEN KIA

ORANJESTAD (AAN): Si man pasa cu diferente cacho, gerencia di Prison di KIA a tene un accion relampago. Hasta debi na e accion aki a surgi poco disturbio basta serio den KIA.

DIARIO a compronde cu presonan a lanta formal contra di guardianan. Bastante daño a worde cometi durante di e listramento aki na unda guardia combina cu sosten di cachonan anti droga a haci un "clean-up".

Den tur esaki, potchi di WC, mesa di ping pong, hasta tubo di awa a worde destrui. Alafin guardianan bisti cu material anti-motin a sa di domina un

grupo grandi di preso cu ta consisti di tanto local y stranhero.

Varios di esnan cu a comete actonan contra reglanan di KIA a keda sera den cachot.

Sinembargo awor DIARIO a ricibi informacion, cu den week-end un biaha mas a descubri droga den KIA!

Parce cu durante oranan di bishita segun informe lo a intercepta cierto cantidad di droga den poder di un detenido. E droga aparentemente lo ta marihuana, y el a worde confisca y autoridadnan concerni tin e caso aki bao di investigacion.

Tin fuerte indicacion cu e

preso lo a ricibi bishita, y na un forma inexplicable e "huesped" lo a pasa e paquete di droga den forma di tabaco na e preso. Esaki seguramente tambe lo tin consecuencia serio pa e persona cu lo a entrega e substancia

prohibi aki na e detenido.

Mas ainda, awor Huez lo baha cu tur peso di ley contra esnan culpable. Ta bin acerca cu gerente di KIA a caba di tene un razia na cierto parti di e instituto. Ainda segun informe cu lo tene uno general

ya cu tin fuerte indicacion cu lo mester mas droga scondi den KIA.

Seguramente e proximo razia ta bay ta uno combina cu Polis, Recherche, guardianan y Douane Recherche cu nan cachonan.

Nada abnormal raporta na Toren:

Algun hende a mira manera dos avion casi a dal den otro

ORANJESTAD (AAN) -- Ayera atardi, poco prome cu 3'or DIARIO a ricibi yamada di un par di trahador di hotel cu a conta nos redaccion con nan a spanta ora nan a wak den halto dos avion cu por poco a dal den otro. Segun e informacion algun trahador y un ke otro turista a wak mescos y "instinto di

conservacion" a pone nan move for di e caminda pasobra ta net den direccion pariba di hotel nan a wak esey. DIARIO a tuma contacto cu Toren di Control di unda redaccion a worde informa cu no tabata tin ningun novedad. Comunicacion di toren cu avionnan a bay normal. E señora cu a atende nos

yamada a bisa cu tin biaha hende ta wak for di tera comosifuera dos avion ta bay dal den otro, pero den aire e situacion ta completamente diferente.

Pues cu otro palabra, pa parce cu e trahador y turistanan a experimenta un fenomeno di "ilusion optico" pues nada abnormal a worde raporta na Toren di Control.

Banda di laman...

PAREHA HAYA DEN AUTO A WORDE ENCARCELA

ORANJESTAD (AAN): Durante cu Polis ta patruyando, nan a constata un vehiculo staciona na altura di "Fisherman Hut". Polis tabata enbusca di e auto debi na denuncia di ladronia. Polisnan a tuma nota di dos persona ta subi-baha for di e vehiculo aki na un forma masha sospechoso.

E homber na promer instancia a cuna nombrenan falso y despues a basha abao indicando su nomber corecto. Ta

trata di e homber di inicial E.R.I. di 48 aña y e muher R.S.B. di 37 aña.

Segun declaracion di e homber cu el a presta e auto for di un tal M. Debi cu Polis no a confia henter e asunto nan a dicidi di hiba e dos sospechosonan y e vehiculo A-739 pa warda.

Vershon policial finalmente ta indica cu a cera e pareha relaciona cu lo demas investigacion.

HURAMENTACION DI 11 ASPIRANT POLIS



ORANJESTAD (AAN) "E persona cu kier bira polis mester haci hopi sacrificio y placer ta bin na di dos lugar".

"Y boso aspirantnan cu a mustra disciplina necesario cu ta tipifica e polis, e boluntad pa laga placer un banda pa un rato, merece mi felicitacion".

Asina señor Comisario Hugo Kock a finaliza su discurso na ocasion di recien huramentacion di 11 aspirant polis como agentenan policial.

E felicitacion a bin despues cu Comisario Kock a expresa

su palabranan di desapunto cu di un klas di 19 persona, solamente 5 a logra pasa nan examen cu exito den e prome instancia.

Despues di herexamen 6 mas a logra finaliza e curso.

Kock no a critica e exigencianan al contrario e ta boga pa un Cuerpo Policial di calidad y no di cantidad.

Su critica tabata riba e docentenan cu no a guia e studentenan suficiente, e propio cursistanan cu ya no mas ta den un internado y pues ta prefera di sali anochi y no dedica suficiente tempo na e

estudio.

Kock tabata autocritico ya cu na su opinion Aruba ta uzando un plan di enseñanza adapta na esun di Hulanda y den 12 aña no a evalua plan di enseñanza aki.

Ademas e plan aki no ta ser uza mas na Huianda.

E propio mando policial a traha riba nivel ehecutivo sin cu a dune e facilidadnan pa desaroya un maneho.

Comisario no ta nenga cu hopi a ser inverti tanto financieramente como materialmente pa mehora e Cuerpo Policial Arubano.

Juez a bisa cu e mayoria ta dicidi

SUPERIOR TOBACCO TA CUMPLA EDIFICIO DEN CAYA GRANDI

ORANJESTAD (AAN) -- Ayera atardi Juez a dicta sentencia den un caso sumario cu Ruben y Alex Mansur a cuminsa pa evita cu Superior Tobacco ta cumprá un edificio den caya.

E caso aki a cuminsa siman pasa y e siman aki a sigui cu esaki caminda basicamente ta un desacuerdo cu tin entre e rumannan Mansur riba compara di e edificio door di Superior Tobacco. Tin rumán ta pro y tin ruman ta contra e venta di e edificio na Superior Tobacco.

Abogadonan mr. Oomen y mr. Carlo a representa Ruben

y Alex Mansur mientras cu abogado mr. Kock a representa e compania Superior Tobacco. Juez despues di a evalua e punto di bista di ambos partido a dicta sentencia di biaha. Juez a bisa cu door di e mayoria ta pa Superior Tobacco cumprá e edificio, e ta kere cu mester desaproba e demanda di Ruben y Alex. Su decision tabata cu e ta rechaza e demanda pa prohibi cu Superior Tobacco ta cumprá e edificio. Esey ta nifica cu Superior Tobacco por cumprá e edificio cu ta situa net banda di Interbank den caya grandi.